

李文忠公奏稿

李文忠公奏稿

卷之五十四目錄

商局船業全數收回摺

光緒十一年六月初八日

羅臻祿等收回乾軍弁勇片

光緒十一年六月初八日

劉船困守籌給津貼片

光緒十一年六月初八日

議撥開源節流摺

光緒十一年六月十四日

崇澍轉運仍請給獎片

光緒十一年六月十四日

豫岸仍請加耗摺

光緒十一年六月十四日

快船難撥赴臺片

光緒十一年七月初二日

周盛傳請卹摺

光緒十一年七月初六日

周盛波留統盛軍片

光緒十一年七月初六日

輪船修工核扣薪糧摺

光緒十一年七月初八日

陳直省出入款項摺

光緒十一年七月初八日

舉辦開練獎敘片 光緒十一年七月初八日

李元華請卹片 光緒十一年七月初八日

雷正新請發柴草價片 光緒十一年七月初八日

機器局報銷摺 光緒十一年七月二十六日

工賑清單片 光緒十一年七月二十六日

送李是應回國摺 光緒十一年八月十五日

法國陸路通商片 光緒十一年八月十五日

肄習西學仍請給獎片 光緒十一年八月十五日

創辦電報請獎摺 光緒十一年八月十五日

盛宣懷請獎片 光緒十一年八月十五日

陳允頤懇辦勸電片 光緒十一年八月十五日

奏保謝家福片 光緒十一年八月十五日

李文忠公奏稿卷五十四

全集一之五十四

桐城吳汝綸編錄

商局船業全數收回摺

光緒十一年六月初八日

奏爲招商局暫售船產業於法約定後仍照原議剋期全數收回恭摺仰祈

聖鑒事竊去夏法提督統率兵艦來華恫喝肆擾海疆不靖招商局輪船駛行洋面日有戒心法人徧布謠言過船劫奪船貨成本太重眾商懼遭不測之禍遂議仿照西國通例暫售與美國旗昌行主代爲經營換用美旗俾可照常駛行以保眾商成本其價照原值銀兩以銀票如數抵給經道員馬建忠與英國律師担文及旗昌反覆商論俟中法事定將銀票給還旗昌仍由局收回船產兩不失信馬建忠因與眾商定議暫售寫立合同契據經臣於上

年七月間詳細奏報奉

旨俟事定後務當卽行收回等因欽此九月間旗昌行東士米德來津臣復飭道員盛宣懷與該行東預行妥商堅訂屆期收回密約欽奉十月二十四日

寄諭招商局暫售他人係馬建忠經手著俟該員回津後卽將收回一事嚴切責成妥爲辦理等因今年法約定後遵卽責成該員並派盛宣懷會籌妥辦欽奉四月二十九日電

旨著懷遵前旨將招商局輪船迅速收回其如何辦理之處卽行覆奏等因欽此又經轉飭遵照旋據稟稱盛宣懷於四月二十三

四日傳知旗昌行東士米德豫備一切該行東來津允遵原議辦理馬建忠亦由滬至津會同籌議磋商月餘該行東願按原價倒賣與招商局彼此訂立合同畫押爲據定於本年六月二十一日

起換旗與船隻有去上海較遠不及調回者卽在別埠換旗至七月初一日將輪船棧房碼頭各項產業悉照原盤收回仍歸商局員董自辦旗昌原給銀票依舊付還其原立售契密約帶回上海於各項收清後彼此交還銷廢至旗昌代商局墊付款項帳目亦卽分別核算清結該洋東素講信義此次保護商局力踐前言頗自言勞亦殊於大局有益經盛宣懷馬建忠與之議明由商局延充總查董事遇事襄助每年送給薪水銀五千兩三年爲限以資酬答期滿後或去或留悉聽局中眾商主持不致再有轉轍伏查輪船招商局爲中國商務大端前以法人起衅暫將船產售與旗昌原係萬不得已之舉今幸中法事定仍照原議剋期全數收回洵足張

國體而協商情堪以仰慰

聖廬除遴派員董認真整頓經理力除積弊將一切因革變通事宜妥細籌定次第清理外所有招商局收回緣由理合恭摺由驛覆陳伏乞

皇太后

皇上聖鑒謹

奏

羅臻祿等收回乾軍弁勇片

光緒十一年六月初八日

再辦辦福建軍務前陝甘督臣楊岳斌所部弁勇前乘平安輪船渡臺被法國兵船擄去七百餘人臣於法約定後與該國公使巴德諾議明全數釋回其中中國軍營掣獲法國弁兵及因案牽涉之人該公使亦請釋放當經奏奉

諭旨允准著臣迅派妥員前赴澎湖會商法兵官將擄去弁兵妥為收回等因欽此旋據巴德諾函開接該國水師提督利士比電稱前截獲平安輪船弁兵在基隆者百名已就近釋放在澎湖者四百餘名及運往西貢二百五十名不日回澎俟中國委員到日交還另有掣獲臺灣澎湖人二十二人一併交還即請將中國俘獲該國兵士及牽涉之人釋放等情經臣電致各督撫臣查照辦理一面遴派候選中書科中書羅臻祿洋員津海關副稅務司馬



士乘坐利運輪船馳赴廈門稟商福建水師提督彭楚漢加派熟識乾軍員弁同往澎湖妥辦旋據羅臻祿馬士稟稱該員等於五月十六日抵廈門與彭楚漢並楊岳斌委員前赴澎湖會商法兵官卽於十八九日將平安輪船所載弁兵王仁和周文翔方國清等二百五十名又弁兵湯賢博等四百六十三名又臺灣澎湖商民九十名共八百三名全數收回並無被傷短少卽由輪船運至廈門並據彭楚漢來文已將該弁兵商民八百三人照單按名點驗分別住候安插等因前來除咨總理衙門查照外查羅臻祿等疊經派辦洋務交涉事件均稱得力此次航海遠役親至澎湖法營會商法提督利士比將乾軍弁勇全數收回並無被傷短少又於巴德諾原函之外收回商民數十人辦理甚爲妥速保全兵民多命實屬勞績卓著擬懇

天恩將候選中書科中書羅臻祿以同知不論雙單月儘先選用  
津海關副稅務司馬士給予三等第二寶星以示鼓勵理合附片  
具陳伏乞

聖鑒訓示謹  
奏

剝船困守餉給津貼片

光緒十一年六月初八日

再直隸官剝船隻承運江浙漕糧向於開凍後修脩二月開南漕抵津卽分起裝運赴通壩藉水腳以資餉口俟五六月間全漕運竣例准駛赴附近各河攬載自謀秋冬生計本屆南漕原議提前趕辦正月初已飭天津道督飭楊村廳卞令剝船一千九百餘隻趕緊修脩脩二月間一律完工催歸水次聽候兌運乃法事未定南漕稽阻不能如期北來各船空泊河干既無水腳可得又不能違例他往攬載嗷嗷待哺困苦不堪臣前飭籌賑局酌撥高粱六百餘石並由天津道預借本年冬季工食略資調劑但每船所得無幾水手至萬餘人之多困守至三閱月之久直至五月底始行開兌各船戶債累層積據報帆槳鉗纜多已押當無力歸贖不能開行正值漕艘連樁北上若不設法撫恤勢必貽誤轉運尤慮其

窮極生玩法之心偷盜攪和弊將百出防不勝防實於  
天庾正供大有妨礙且本屆漕竣約在七八月以後將近封河勢  
不能如往屆之攬載獲利工食又已預借則三冬之衣食無出以  
萬餘飢餒無賴之眾散之地方亦恐擾民滋事疊據天津道萬培  
因署楊村迎判姚身具詳請撫前來臣查核確係實情所請實爲  
慎重漕務起見已商江浙糧道王毓藻廖壽豐卽由該糧道於漕  
項內每船另籌給津貼銀十兩由南省委員自行發給如此則困  
守時債累可紓漕糧得以及時轉運或更少留餘資爲禦冬之具  
亦不致意外之虞如再有偷盜攪和者嚴懲不貸庶恩威並用情  
法得平此因海防告警漕運愆期不得不妥籌撫恤嗣後運務照  
常斷不准援以爲例除咨行外所有官剝船戶困守過久苦累太  
甚現由江浙籌款撫恤緣由理合附片具陳伏乞

聖鑒敕部知照謹奏

議擬開源節流摺

光緒十一年六月十四日

奏爲部擬開源節流各條逐一體察議覆仰祈

聖鑒事。前准戶部咨開會議籌餉一摺。單一分應由各省遵照辦理。等因。當經分飭司道關局各就實在情形認真籌議。旋據分條具覆。前來竊維理財之法。誠不外開源節流二端。臣久更兵事。備歷艱辛。又忝任畿疆瘠苦之區。於生財節用之道。未嘗不力求實濟。凡有源可開而爲耳目所及。民情政體無礙者。無不斟酌施行。其一切用款。則必權其緩急輕重。是否在必。必需力戒浮糜。嚴稽出入。無要者分別停緩。必需者亦不敢過事吝刻。致誤機宜。惟直隸土薄民貧。素鮮物產。實非南省可比。絕無利源可開。而差繁事劇。災歉頻仍。出款皆有定章。亦無可分外節省之處。方今外患日迫。不得不亟謀自強。拱衛根本。海防爲久遠要圖。展蒙

諭旨飭辦事關重大尤未可以尋常比擬者戶部前於籌餉及議  
覆下寶第俗餉疏內謂近年實入各款不爲不多民生日苦未可  
於此外再事苛求又言若必搜求利孔竊恐適以厲民於議覆余  
思詒開餉源疏內謂自輪舶通商內地生計已不如前重以釐捐  
民用更困若再加徵絲茶糖酒獲利幾何擾民無藝於開捐疏內  
謂此時流未易節源未易開求其不病商累民而於財用可稍裨  
者惟開捐一事等語是近今開源節流之難部臣已籌之熟矣臣  
仍當節慎度支隨時隨事設法經營就款核實籌辦以冀稍裨時  
局謹將部擬各條及司道等詳稟分別可行不可行逐一議覆繕

單恭呈

御覽伏乞

皇太后

皇上聖鑒敕部查照謹奏



謹將部擬開源節流二十四條逐一體察議覆繕單恭呈

御覽

開源第一二條擬令兩淮按引收捐其餘有鹽務各省能否仿辦  
並擬令各省加收鹽釐查長蘆係帶銷之區現行京外引六十餘  
萬道向不能如數領運課款則須商人包賠從前每引課款不過  
一兩一二錢道光以後逐漸加增並將舊商酌空賣令現商攤補  
又有軍需復價祭工加價等款每引須完銀二兩數錢且兵燹災  
荒之後物價昂貴成本較重遂致商累日深雖疊次設法整頓而  
課帑仍有短欠懸岸尚未規復實無力再捐餉加釐戶部於議覆  
余思詒請加鹽價疏內謂多取於商則成本重必致滯銷強取於  
民則閭閻貧賤食私流弊日甚近年奏銷未盡依限引課未盡全  
完今再議加價恐因此商力疲困額課終虧非慎保鹺綱之計等

因所論實洞見本源長蘆既引滯商疲亦向無冗費自無庸片議  
開源第三條擬就出茶處所徵收茶課查直隸並不產茶應無庸  
議

開源第四條擬給販運洋藥華商行坐部票按票捐銀查天津洋  
藥除完進口稅外已另定新章每百斤統令華商交釐稅銀八十  
六兩詳細分咨總理衙門戶部在案實較票捐爲數增多辦法亦  
甚直捷至行坐票事涉繁瑣商情不願若重複令捐亦非政體應  
無庸議

開源第五條擬令沙田及牙帖捐輸查直隸並無沙田其各屬牙  
行皆因地瘠民貧市面極小所取用錢除照例納稅外僅敷餬口  
若令按年月請部帖捐銀數十兩數百兩勢必藉端騷擾勒索商  
民害無底止咸豐十一年戶部曾令直隸牙行赴部認課領帖旋

因百弊叢生地方不堪其擾同治元年經戶部奏明停止仍照舊  
由州縣徵解是此事礙難改革已有明證應無庸議

開源第六條擬給煙行酒行部帖按年納課查直隸酒業以燒鍋  
爲大宗早歸戶部給帖收課無可再議此外惟向燒鍋販賣小本  
營生其煙菜閒有栽種之處不過一隅中之一隅亦係零星小販  
各屬煙酒兩業往往兼賣雜貨並無專行大棧勢不能加徵其課  
算及錙銖致礙小民生計應無庸議

開源第七條擬令匯兌票號入貲領帖查天津匯兌票號係由京  
城分設各處飭府縣傳諭遵照據稱該分號僅爲京城上海各莊傳  
遞信息函運銀兩並非自做生意無力完課一切事宜皆以京號  
爲進止等語已咨順天府尹核辦應俟京號定議再行察酌

開源第八條擬劃定各項放款減平減成查直隸司道府廳州縣

年例放款及旗綠各營兵餉有每兩應扣六分部平者有減一二三四成者有款關重要或數目零雜不能扣減者早經劃定章程奏咨有案其所收扣平減成銀兩藩庫則因入不敷出奏明留存備用運庫津關道庫則按年解部亦各有一定章程應均循舊辦理此外各軍餉需海防用款惟淮軍新餉等項向按湘平支發折成庫平報銷原爲節省起見但以所收庫平核計每兩實止應扣三分六釐三毫並無四分之多出入一律毫無參差未便改扣四分轉致軍士疑怨至各鎮練軍及淮防各營新糧本較湘淮餉章銀數減少又值海防勞瘁勢難再行扣減又如購置外洋船礮軍械機器料物等項皆與洋人交涉修築礮臺等工或係洋匠包辦及洋員洋匠薪工有以英鎊馬克佛郎洋元折合庫平者有以規平津平行平折合庫平者有本用庫平者皆隨宜核實辦理斷難

強令扣平減成又如津海新關開支薪工經費各款華洋員弁書役扞手同在一處當差凡稅務司所用者皆發庫平不能扣減則監督所用之人亦未便扣平轉致事多掣肘又如天津貨釐項下支發各款所收釐捐本係天津市平每兩較湘平尙短四釐祇能原收原放亦不能再減凡此皆應循舊無庸更議者現飭自本年六月起將天津支應局機器局保定練餉局文發各局所文武員弁司事書吏人等薪水公費及水師船艇雷營薪糧公費等項並地租礮費雜支用款概按湘平扣放每兩扣銀三分六釐三毫仍列收木案作正開銷毋庸另存解部先將應扣各款由各該局開具簡明清單咨部備案准軍向係統扣無庸再開至洋銀每元約合紋銀七錢制錢每一千六百文約合銀一兩但各處市價隨時低昂不定未可繩以官法若必明定劃一章程轉涉虛偽應仍隨

時核實辦理

開源第九條擬嚴提交代徵存未解銀兩並嚴定交代限期此事前已疊飭藩司等認真整頓清理應再查照部議及向例向章分別查辦力杜虧挪

開源第十第十一條擬嚴催虧空應繳應賠各款及入官產業勒限變價解部亦飭藩司等分別查辦

開源第十二條擬酌提漕規鹽規餘款查直隸並無漕務其長蘆鹽務項下緝私經費每年僅收商捐銀三萬餘兩應撥永平所屬七州縣官辦緝費銀一萬六千兩向存運庫扣抵該州縣應交課款又撥滄州等四州縣商人緝費銀八千五百兩薊州等六州縣商人緝費銀八千兩係屬商捐商用核計尚有不敷長蘆素稱瘠苦商情疲累實非他省可比向無院司各衙門鹽規應無庸議

節流第一條擬裁減釐局經費除津海關洋藥釐捐與貨釐情形不同早經奏定經費數目由商董自行經理現定新章加重收捐必須添設巡卡丁役已另有專案咨部外查直隸僅天津大名兩處設局抽收百貨釐捐每年約收銀十萬餘兩其應支總局分卡委員司事薪水差役巡丁工食房租船價煤炭油燭紙張等項一切用款係查照部章統計不及一成之數歷經報部准銷有案此次部議謂各省釐局經費有扣至五成者有一筆開銷銀十數萬兩或數十萬兩者皆係他省之事直隸既照部章撙節辦理自應仍循其舊

節流第二條擬核減各關經費查直隸天津道所管海稅通永道所管木稅每年例定經費僅止銀數百兩皆不敷用津海關道所管新關係督飭稅務司經理向於洋稅項下每兩坐扣八分以充

華洋員弁薪工一切經費往往收不敷支須照奏案由洋藥釐捐  
項下撥補分別按年按結報銷有案均屬無可核減亦無開支補  
平補水及匯費諸名目至該關道所管鈔關每年向有京中閣部  
院科平飯津貼及本關經費銀一萬二千九百餘兩除閣部院科  
解款不減外其本關經費已兩次議減二成現止按六成開銷今  
擬於無可節減之中自本年三月關期之日起再行設法核減一  
成銀一千六兩五錢七分三釐一併報解歸公連前共減五成較  
例定數目省出一半矣

節流第三條擬核定各省局員額數銀數查直隸前於咸豐同治  
年間有因尋常事件分設各局或事竣而局未撤者臣已早飭裁  
汰歸併司道等辦理以節糜費惟北洋爲洋務總匯之區交涉極  
繁兼之籌辦海防事體重大凡水陸各軍糧餉軍火等項未辦製



造轉運收放各事以及教練兵弁並一切緊要營務洋務工務頭緒繁難臣斷不能以一身兼理眾務必須分設局所學堂遴員經理各專責成力圖精進迥與尋常省分事例不同近復屢有新章簿書期會之繁數倍曩昔臣疊就事務之緩急定員數之多寡薪水之等差有一局而派若干員亦有一員而兼若干事要皆量材器使稱事授精其無關緊要及可相因而理者隨時分別裁併決不任冗員充數業飭天津海防支應局保定練餉局各將支發員數銀數查明專案咨部其歸淮軍報銷局天津機器局支發者亦疊經奏咨准銷有案惟海防規模難定勢難遽爲定額應仍隨時核實辦理總期不糜費亦不誤事

節流第四條擬隨營文武分別裁汰酌定額數銀數查淮軍公費一項按照營制並無委員薪水在內故隨營辦事得力委員不論

有無奏調向在開支薪水前已疊次節減並應將員數銀數奏咨  
准銷有案現值海防緊要巡查轉運催提各事一切佐理需人難  
再議裁其直隸提督李長樂移駐海濱隨營辦事員弁亦於光緒  
六年奏定員數銀數由天津海防支應局支發均應照舊辦理除  
再將員數銀數咨部外至練軍各營事務稍簡現無隨營員弁應  
無庸議

節流第五條擬酌減內地各省防軍口糧查直隸係海防省分各  
營皆屯紮海口要隘異常勞苦不在部議減餉之列至各鎮練軍  
原因制兵餉需太薄無以贍其身家即不能得其死力故議加餉  
抽練歸併成營化其游惰之習以則一兵得一兵之用現在調駐  
海防者十之七撥赴各屬擇要巡防及遠戍邊外多倫朝陽庫倫  
者十之三並非無事坐食礙難議減應仍照舊支給以固兵心

節流第六條擬酌減內地防軍長夫每營五百人只准用一百名查直隸各軍除屯紮海防無庸議外其練軍馬隊平日只有伙夫本無長夫名目步隊每營五百人除伙夫外平日僅有長夫二十四名既不及百名之數自無庸更議

節流第七條擬防軍有營房者不准重複再領帳棚查直隸各軍或在海口操防工作或巡防大道要隘地曠人稀風勁日烈必須支搭帳棚方免露處亦不致佔礙民房應係照章製給帳棚應用其有民營營房者係由營中自辦以備回營時暫作棲止及堆儲軍裝食米等件並非既領營房經費又領帳棚向無重複開支情事應仍循舊辦理

節流第八九條擬核定內地及防戰各省兵勇餉數並確估各項軍餉按年指撥查直隸練營制兵除撥歸練軍外底營所存無多

不敷差操盤經咨行提鎮核議無可裁減但不准空額及老弱充  
數其人數餉數及按年估撥事宜飭由藩司分別開報核辦至山  
海關北塘等處新募津勝等營係專就部餉支放業經分晰造冊  
報部外其各鎮練軍練勇馬步隊計三十一營六小隊礮隊四哨  
其官弁兵勇一萬四千餘人應需餉乾薪公軍裝軍火並伙夫長  
夫等口糧各項雜支及河工經費核計月支銀十萬餘兩每月向  
指部撥固本餉五萬兩江海關協餉連河工在內合三萬兩長蘆  
鹽斤復價運藩庫底餉不及二萬兩近年江海關欠解至五十餘  
萬兩實屬收不敷放淮軍原有馬步隊及舢板礮船計四十七營  
十六哨四十二棚其官弁兵勇二萬四千餘人月需餉乾薪公購  
製軍裝軍火教習員弁及小輪船舵水工匠長夫等口糧及各項  
雜支銀十九萬餘兩向指各省關奏定專款解濟近來解數漸不

如額且有歷久未解之處支絀益甚津防原有練軍並大沽北塘等處官兵計十四營三小隊共官兵夫六千餘人歲需餉乾薪公軍裝軍火各項雜支約銀三十六萬至四十萬兩向指長蘆鹽斤復價歲解銀十萬兩津海關洋稅藥釐歲約撥銀二十萬兩左右東海關協餉每年原額六萬實解五萬兩以之抵支恆苦不足故每年須截留長蘆撥解保定練餉二三萬兩藉資接濟以上營數人數餉數及實支數目歷經分起造冊報銷部中均有案可稽今再將各省關應撥淮軍餉銀額數及近年解數另行彙冊咨部直隸爲近畿門戶根本重地沿海地段縣長四通八達東西洋各國往來窺探虛實不可無勁旅駐防爲建威銷萌之計又須於奉天之旅順口作爲海外水師口岸駐軍布置相爲犄角現有新舊各營難議裁減餉需斷不可缺除部餉按月請領外其淮軍練

軍指撥協餉皆係同治七八年會商各省奏定之案彼此遵循已久呼應較靈自無須按年月行估撥轉致觀望延誤應仍由部催令各省關務照原額源源撥解以維大局至奉撥北洋經費一款專爲創辦水師購船置械選將練兵係海防久遠至計經總理衙門戶部奏定應由江蘇浙江歲撥釐金各二十萬兩江西湖北廣東福建歲撥釐金各十五萬兩並撥粵海關海浙海山海各關四成洋稅及江海關二成洋稅原議稅釐兩項每年約可得銀二百萬兩臣因各省釐金收不敷解奏准減撥八成並添撥各關四成招商局稅乃廣東福建釐金皆截留自用江蘇則以湖北無著之款空抵浙江湖北停解已久江西亦解不及半又值各關稅收短絀每年解到者不過數十萬兩自上年海防告警報撥更稀來源枯竭現在庫無存款而所購西洋鐵甲鋼板快船魚雷艇轉瞬即

至月需巨餉錢活操巡並訂買各種鎗礮價值及應發緊要餉項多而且急一籌莫展焦灼萬分昨欽奉

諭旨海防以大治水師為主船廠如何增拓礮臺如何安設鎗械如何精造均須破除常格實力講求並遴選將才籌畫經費等因誠使擴充辦理必須另籌大宗的款庶免空言無補卽就北洋目前事局已岌岌難支所有各省關撥定經費應請由部一體嚴催設法籌解以救燃眉之急至北洋現有船艇礮臺雷營庫廠船塢學堂等項已隨時奏咨有案其船數人數餉數因規模未定勢難作為定額應俟察酌情形續籌奏辦

節流第十條停止不急工程直隸地方惟各河工程關係民生水利最爲緊要頻年多就捐款撙節修辦以工代賑一舉兩得此外但係無要者概議停辦茲再照部議飭司移行各衙門一體遵

照

節流第十一條擬各項欠發勒限清釐各項預支分別核辦查直隸係缺額省分向來藩庫入不敷出故歷年欠發之款不少即使以前者設法清釐以後者仍不免欠發惟有隨時察看庫儲情形酌量核發其俸餉等項無論新舊以每年只發四季爲率不必遽將舊欠停發使應領者絕望人心不固以後辦事爲難至各鎮營及各局有於頭年封印前預領次年春餉者係歷辦章程毫無弊混各有奏銷撥冊可稽茲已飭藩司將歷年欠發各款查核造冊送部此外歷年

陵工長墊及橋道差場等項經四並各屬墊支年例各款因候准銷部覆故未給領勢難作爲舊欠且多已列入交代作抵無庸造冊應仍隨時照數核發有交代未清者扣除撥抵又歷年文武



衙門俸廉馬乾役食工料及駐防孤寡錢糧等項或因候算交代或因輾轉行查任卸起支日期勢不能年清年款應俟查算明確照數給領仍與奏銷撥冊內分晰造報至應預發各款若不論輕重緩急概令報部聽候覆准始准開放必致貽誤事機其關係緊要者應仍由臣等隨時核實酌發以符向章再准軍向有欠餉一項初因各省撥解愆期未能按月發足致有短欠本應隨卽補還惟餉需支絀不得不節縮經營故雖酌補舊欠而新餉仍有欠發所以慎度支備緩急也近因海防緊要須購大宗精利軍火曾與各軍商借欠餉五十萬兩移緩應急又如派防朝鮮各營該國銀賤物貴月餉不敷日用又分紮沿海各營操巡工作異常勞苦用費既多衣履亦易破壞皆須酌發欠餉津貼勢難停止不發致拂軍情應仍照舊核實辦理隨時將補發之款列冊報部除截至光

緒九年底欠餉數目已於第十二次銷案開報外其十年分欠數  
俟第十三次報銷咨送又津防報銷案內歷年欠發銀兩亦即開  
單咨部再行陸續酌發

節流第十二條另定各省起運存留查直屬地糧起運存留各數  
遇有增減向係隨時更定如咸豐八年裁減鋪司工食即於存留  
銀內核除歸入起運項下造報光緒二年議定

文昌帝君加祭祭品又於起運銀內提出列入存留項下造報他  
項類此並非仍循嘉慶年間舊額查無留多用少轆轤參差之弊  
至官俸役食驛站夫馬工料早經奏定一成實銀其留支項下應  
行扣解司庫各款須各照該年應支數目核扣多寡不同勢難預  
定況係缺額省分與他省庫存候撥者不同自無須通查奏改免  
致繁費

臺灣轉運仍請給獎片

光緒十二年六月十四日

再前保上海運解臺灣餉械出力員弁本年正月二十日奉

旨邵友濂著賞給一品封典龔照瑗著賞加二品銜賞戴花翎周國興等均著照所請獎勵等因欽此旋准吏部咨所請封典翎枝各項有與定章未符者應分別改議另核等因在部臣係按轉運勞績辦理故擬駁改惟臺灣遠隔重洋其時法國兵艦已屯集閩海封禁臺北各口臺意圍困商輪不行文報阻絕華船被其焚燬劫殺者不一而足軍火餉需尤敵人所注意而欲得甘心該員等當軍情萬緊之際不敢徒作望洋之歎疊經冒險設法運送淮軍兵勇三千餘名大小後膛鎗礮及子彈水雷電綫多件餉銀十餘萬兩往還重洋多至十次出沒驚濤駭浪之中盤旋飛彈墜丸之下不惜軀命出死人生其勞績實與在洋接仗無異臺北有此接

濟藉得與強敵支持洵屬有功大局向來獎勵勤勞本視其事之輕重難易以區分等差茲事關係重大亦實艱險異常自應量予優獎除道員邵友濂龔照瑗現仍奉

旨賞給封典翎枝外所有同知銜周國興等未便兩歧該員等原請仍銜階級等項擬懇

天恩敕部仍遵正月二十日欽奉

俞旨給獎以昭激勸准南洋通商大臣兩江督臣曾國荃咨請會奏前來理合會同曾國荃附片陳請伏乞

聖鑒訓示再內有余應璜一員係廩生出身保以教諭與定章相符合併陳明謹

奏

豫岸仍請加耗摺

光緒十一年六月十四日

奏爲豫岸蘆商責令增繳加價銀兩仍請照案暫加耗鹽以資貼補恭摺仰祈

聖鑒事竊准部咨河南撫臣鹿傳霖奏請將長蘆運豫鹽斤加價每年原繳五萬兩者飭商繳納八萬兩以五萬兩抵補榮工墊項以三萬兩作爲豫省裕餉之款均由長蘆解部等因當經轉飭長蘆運司傳諭豫岸蘆商遵照茲據該司季邦楨詳稱河南蘆鹽加價始自同治六年每斤加錢二文設局抽收以充該省河防兵餉經戶部議覆摺內聲明河南食四省之鹽非皆長蘆引岸旁處鹽價輕減卽有浸灌充斥之虞不可不防等語同治七年前河南撫臣李鶴年請將此項加價每年由商人彙繳銀八萬兩並經戶部奏改爲彌補榮工墊款八年十年曾國藩與臣皆以商人苦累請

將加價停免部議未行復經臣會同前河南撫臣錢鼎銘查明每年八萬兩銀數太多飭據豫引各商祇能交銀四萬兩旋加增一萬兩合成五萬兩自同治十一年秋季爲始隨引攤交運庫就近解部歷經循辦在案惟南引自加價以來商力益疲每年交銀五萬兩已甚竭歷茲令繳納八萬兩明知各商苦累勸辦不易然值此時艱餉絀敢不勉任其難該司當卽面諭妥籌遵辦旋據南引商人潤代興等聲稱此項加價同治七年議繳八萬兩積年拖欠是以一再呈請停免迺格於部議不得已每年認繳五萬兩如果加價取之於民自應儘收儘解何敢較量多寡無如名雖出自民間實則仍由商繳緣河南一省食淮東晉蘆四省之鹽賣價稍有軒輊小民貧賤食私法令亦不能禁加以沿河各屬徧地淋硝曬鹽其價更賤誠如同治六年部議旁處鹽價輕減蘆岸卽慮浸灌

充斥商等惟有比擬鄰封時價酌量操縱若拘執加價勢必停秤  
不賣是每年所交加價銀兩實皆商人血本並非得自豫民且由  
津運鹽至豫遠幾二千里非數月不能抵岸並須頭年預購鹽斤  
方免誤運視直商之得以輓轡周轉者成本輕重不可同日而語  
運道既遠傷耗必多水陸疊更風日交剝計每包加耗斤重約在  
二三十斤至四十斤前曾奏准每包所耗二十斤於五年限滿後  
改爲加耗十斤上年展限期滿停止加耗鹽包之虧折如前商人  
之賠累更甚方慮五萬之數難交昔再令添交三萬兩商力實屬  
未逮復經該司再三勸勉責以大義咸稱踐土食毛敢不竭誠報  
效第商情苦累必欲責令每年繳銀八萬兩惟有仍懇每包加耗  
二十斤俾正鹽得免傷耗商力或可周轉至南引自同治十三年  
加耗二十斤並未佔礙銷路可見所加之數實爲長途折耗之明

證道後減爲十斤而正鹽卽有傷折故每年交款五萬兩不免虧  
賠今交款加增若仍止加耗十斤虧賠必甚並稱加價一款向於  
領引時攤交現擬每引交銀四錢計每年南引出庫約在二十萬  
可敷解款八萬兩之數如有不足年終由各商分攤歸補聞應補  
榮工部款僅欠三四十萬約計四五年補還完竣屆時請將八萬  
兩一款停交以舒商力並豫引鹽斤加價暨所加耗鹽一併停止  
仍符舊章等語該司以豫岸距津道遠運艱前因逐程盤剝多耗  
一斤之鹽卽多賠一斤之課各商既加累於直岸又須每年交銀  
五萬兩故請於舊定斤兩外每包加耗二十斤經戶部奏稱長蘆  
新鹽質嫩易於虧耗若不量予加增商人無力賠墊必致掣短斤  
兩有礙民食設或鄰鹽乘機浸灌爲害更鉅准自同治十三年起  
予限五年嗣於光緒五年八月限滿復經奏奉部議謂不得不量



以體恤准其加耗十斤上年八月限滿卽經照案停止茲據該商等所稟各節皆係實在情形欲求裕餉恤商兼籌並顧惟有仍准援照同治十三年成案每包加耗二十斤卽責令於原認加價五萬兩之外每年添交銀三萬兩一併解部均自奏准之日爲始定限五年俟限期屆滿如業工墊項已經歸清應否准如該商所稟卽將加價加耗一併停止再行察看核辦等情詳請具

奏前來臣查鹽加價於民本有官不蔽私之弊故向來有名無實商人繳官之款無異捐交今因時艱餉絀交款責令加增而正課關係尤重欲使課款兩無短缺必量商力之所能行若僅顧官款不恤商艱則商力不支參懸相繼正課亦因而貽誤該運司李邦楨再四體察擬令每年交銀八萬兩一併解部仍准每包加耗二十斤以資貼補而免虧賠係爲課款商情兼籌並顧起見事非

得已仰懇

天恩俯准照議辦理庶於部庫有裨理合恭摺覆陳伏乞

皇太后

皇上聖鑒訓示謹

奏

快船難撥赴臺片

光緒十一年七月初二日

再奉五月二十六日

寄諭楊岳斌等請撥快船到臺備用能否照數撥往著奏明辦理等因欽此遵查北洋僅有超勇揚威快船二隻現因朝鮮防營照約撤回必須酌撥兵船前往巡防偵探動靜藉資鎮壓事機極關緊要已飭統領水師丁汝昌派該兩船輪替赴朝鮮之仁川口暫駐梭巡稍作聲援竊無可另派赴臺昨欽奉電

旨飭訂購鋼面鐵甲船四艘備臺澎之用雖購造需時而目前法兵已退究可指為將來籌防之需船政相距較近新成橫海一船或尚可派往應用理合附片覆陳伏乞

聖鑒謹

奏

周盛傳請卹摺

光緒十一年七月初六日

奏爲統兵大員甫經奔喪回籍旋因傷發病故謹臚陳事蹟請

旨優卹恭摺仰祈

聖鑒事據總統盛字新舊各營遇缺奏提督前涼州鎮總兵周  
盛波呈稱胞弟盛傳前奉

恩旨賞假百日回籍治喪遵卹呈奔就道頃接家信知於六月初  
五日馳抵里門日伏苫次哀慟過甚以致牽發舊傷創痕迸裂嘔  
血數升竟於六月十四日酉刻出缺等情前來伏查周盛傳籍隸  
安徽合肥縣咸豐初年偕胞兄盛波在籍辦團值僞英王陳玉城  
僞孚王陳德才等大股悍匪闖至盛傳以少擊眾屢獲大捷以驍  
勇著名同治元年臣督師赴滬檄令帶隊東下是年七月率師攻  
克青浦八月回援上海擊敗僞慕王譚紹洸之眾於北新涇九月

攻克嘉定復會諸軍馳解四江口之圍二年二月攻克太倉州城  
先是賊酋蔡元濇獻城偽降我軍倉猝中伏盛傳以嚴兵殿後賊  
不敢偏七月攻克江陰縣城十一月攻克無錫縣城生擒偽潮王  
黃子灘父子乘勝進攻常州受礮子傷甚重三年春常州守賊偽  
護王陳坤書由城中分竄楊庫以擾官軍之後盛傳抽隊回剿盡  
殲之復率所部踰毀城外賊壘巡薄城根與賊搏戰城上礮石如  
雨頭而又受重傷昏暈竟日猶裹創強起與諸軍併力猛攻奮勇  
先登遂克常州府城旋移紮溧陽收復廣德逐賊於湖州徽州之  
交江浙皖南遁寇以次蕩定而捻逆大股由楚竄擾英霍臣與前  
大學士曾國藩商調該軍渡江迎剿四年五月前安徽撫臣英翰  
被困於雉河盛傳麾軍立解其圍遂獲奇捷五年三月連敗賊於  
考城鉅野城武荷澤等處拜翎管撥指刀鏹荷包之

賜五月擊牛洛紅於亳州龍王廟大破之七月又解柘城之圍六年二月奉

旨補授廣西右江鎮總兵四月蹙賊於信陽之譚家河斬馘逾萬旋由豫入東轉戰至江蘇徐海賊勢漸衰東擒尋卽肅清而西擒張總愚一股蔓延河朔七年正月臣檄調該軍隨同北上追賊於直東豫之交屢有斬擒五月賊竄吳橋盛軍時駐該縣毛家莊偵賊將至設伏狙擊大破其眾乘夜追至德州之楊丁莊四面合圍縱擊搜斬殆盡陣斃張逆之姪張三彪生擒逆首李老懷及大小諸賊目西擒不復能軍遂以殲滅九年臣督師赴陝盛傳勦平北山股匪旋移軍來直調補天津鎮總兵創築新城仿造洋式礮臺以實大沽後路又於津東之新農鎮至大沽海口創開新河九十里分闢支河十數條上接南運減河又於減河兩旁多開溝渠以

便農民引灌其新農鎮以下又開橫河六道添建橋閘三十餘處分運河盛漲下匯海潮借淡刷鹹營成稻田六萬餘畝其瀕河兩岸可墾田地奚止億萬畝居民賴之一變從前斥鹵之舊屯田水利百廢具興沿海一帶畎澮交錯樹木成陰兼可限戎馬之足工作餘暇日以教操爲事而於西洋後膛鎗礮尤能深窺祕奧手著操鎗章程十二篇訓迪弁勇三令五申每合各營打靶取準校其優劣捐廉獎賞以故士自濯磨技藝精熟盛軍利器足與西洋相埒爲各省防軍之冠非偶然也平日治軍專以不擾民爲主駐軍之處紀律肅然秋毫無犯比歲海饑集將佐捐資設廠賑粥遠近窮民全活無數日短衣匹馬巡視各營與士卒同甘苦醫藥有資殯葬有所人憚其嚴又未嘗不感其惠生性至孝同治十一年山津假旋適值母病刲股和藥以進嗣後屢以親老乞歸臣因

畿防重要堅不放行光緒八年擢授湖南提督盛傳感激

恩知益思自效不敢復以家私爲念惟頻年在營積勞病劇方慮其困憊難支夏初聞訃不忍不令其弁喪藉資休養仍與約定百日期滿卽須遵

旨回營不意哀戚奔馳觸發舊傷遽爾身故該提督隨卹賊辦防近三十年實與兵事相終始今

畿輔失一千城微臣少一臂助順時局之曰艱痛將材之凋謝不能不爲

朝廷惜此人也合無仰懇

天恩敕部將署理湖南提督周盛傳照提督軍營病故例從優議卹並將戰功事蹟宣付史館立傳以彰忠盡至淮軍諸將如程學啟張樹珊楊鼎勳郭松林吳長慶等均蒙



恩准建祠

子諡周盛傳勲績與程學啟諸人相等而約束軍士講求操防堅忍耐勞興利通變其經綸智略尤過之應否

賜諡並

准其於安徽原籍及立功省分建立專祠之處出自逾格

恩施非

微臣

所敢擅擬所有統兵大員傷發病故緣由謹繕摺由

驛具陳伏乞

皇太后

皇上聖鑒訓示謹

奏

周盛波留統盛軍片

光緒十一年七月初六日

再周盛傳因病出缺所遺督湖南提督員缺應請

旨迅賜簡放以重閫寄盛軍新舊各營應仍照前奏責令周盛波兼統查周盛波於同治四年卽補授甘涼鎮總兵其得保遇缺題奏提督亦已二十載准軍諸將資望無有出其右者卽論將才亦當推爲巨擘惟丁憂人員不便代爲乞

恩第念該提督謀勇兼優戰功卓著寬和馭下深得士心其才實能獨當一面准部勝兵多而宿將少盛軍馬步各隊利器精練可稱無敵經周盛波周盛傳兄弟苦心訓教二十餘年始克有此節制之師若非統將得人則強兵易弱而非

朝廷稍重統將之威望亦不足以彈壓眾心臣愚慮所及用敢附片密陳伏乞

聖鑒謹

奏

輪船修工核扣薪糧摺

光緒十一年七月初八日

奏爲輪船修工期內核扣薪糧歷照開章辦理礙難率改以期持平而免窒礙恭摺仰祈

聖鑒事竊查閩省船政前議輪船修工期內核扣薪糧章程定以四十日以內爲小修四十日以外爲大修遇大修之船自管駕以及各項人等薪糧通船概給五成公費月給銀六十兩水手幫同做工礮勇令其操演小修不在此例如吏調管駕新募舵水俟修竣試車之日起支亦不在此例等語歷經查照辦理在案嗣准兵部咨以大修概給五成未免漫無區別將月支銀自二百六十兩至一百兩者遇修工期內改爲支給二成薪糧月支銀自六十兩至四十兩者遇修工期內改爲支給三成薪糧月支銀自三十兩至二十兩者遇修工期內改爲支給四成薪糧其餘月支銀十六

兩至八九兩者遇修工期內卽照所擬支給五成薪糧無論大小  
修一律照扣儻有經年始能修竣之船其管幫人等應卽先行撤  
遣俟修竣試洋之日再行照額募補以節虛糜等因上查南北  
洋各兵輪船新糧本較陸營爲優原以兵輪船創自西洋其用人  
薪費獨豐中國經營船政不得不仿而行之而在船各色人等又  
須選擇精於駕駛熟諳機輪之人方能勝任非若陸營募勇但求  
年富力強者便可操練成軍也顧此等人各挾所長以圖口食馭  
之之法必平曰有以養其誠服之心臨事乃可鼓其忠義之氣若  
因惜費之故招之來而麾之去以言經武將廢教習之前功以言  
儲才難收鼓舞之實效權其輕重似小費未可概省而船章尤貴  
持平前次閩廠所定大修期內概扣五成新糧減發公費銀六十  
兩小修不在此例原於撙節餉項之中仍寓固結人心之意且入

賜修船時并目監修水手做工礮手操演仍各有應辦之事非同  
虛糜今部議按支數之多寡改爲支給二成三成四成五成薪糧  
經年修船者應卽遣撤在部臣以餉需支絀力求撙節具有不得  
已之苦心苟外間可以勉力奉行自應遵舊爲令惟其中窒礙多  
端實難緘默不言蓋兵輪船充當執事者大都閩廣滬甯之人其  
始多受雇於商輪船司理駕駛機器諸事兵輪船取其駕輕就熟  
是以招而用之加以操練使就範圍然欲一船之人指臂相聯性  
情相習亦非管駕官數年之訓練不可顧此輩浮動之習計較之  
私在所不免使知修期大減薪糧修期久者且須遣撤則此船不  
合必去而之他船此省不合又去而之他省其技藝可觀者旣不  
能禁彼之不去又安能強人之不留迨至一船修竣而得力之大  
副鐵櫃無人服習之水勇礮手無人從新招募操練需時倉卒設

有事端其何恃而禦侮且天下事有一利必有一弊以數十百萬金製成之船付之一管駕之手此事何等鄭重儻該管駕官因修船減餉過甚而遂遷就從事遇鋼板之偶有鏽蝕而不修遇木壳之偶有剝朽而不修遇機器鍋鏽之偶有損傷而不修日復一日必將一壞而不可收拾又或修船慮減餉之多遂至先留餘地船眾既遣撤之後遂至率招賤工此皆臣等所反覆籌思審其利弊而深慮得失之不相侔者當此餉源枯竭之時臣等亦知節省爲第一要義惟兵船大修期內業經照章核減薪糧若節省太過不得其平其弊轉至多所損失合無仰懇  
天恩俯准南北洋兵輪船修理仍照閩省原議章程於四十日以內爲小修不扣薪糧四十日以外爲大修通扣五成薪糧以示體恤之處出自

逾格鴻慈謹合詞恭摺具陳伏乞  
皇太后  
皇上聖鑒訓示謹  
奏



覆陳直省出入款項摺

光緒十一年七月初八日

奏爲直隸藩運關庫及淮練軍海防餉需出入款項就近數年情形切實約計逐款分晰開單恭摺覆陳仰祈

聖鑒事欽奉五月初八日

寄諭各省關每年所入之款究竟實有若干其常年例需及現在添支防勇局卡餉需薪水各款實在費用若干此後常年可以裁減歸併節省之款若干著切實核計逐款分晰開單奏報等因仰見

朝廷經畫海防通籌國用至意欽服莫名當飭藩運司關局各就出入款項認真遵辦茲據陸續詳覆前來臣維直隸爲畿輔重地各省通衢向來事劇差繁供億極巨卽如各陵寢祭品守護官兵役俸餉大小差橋道等項經費古北等處

口外驛站經費張家口外牧丁經費熱河經費皆他省所無者駐防旗兵他省或有或無其有者數亦無幾直隸則處數兵數獨多凡此皆動需巨款驛路四通八達夫馬之費亦復不少他如綠營河營兵餉各屬官俸役食及一切緊要支款並未定南北運籌河工費新增東明黃河工費均關地方治忽民生利病又須撥解京餉暨東三省新疆協餉而地方貧瘠源無可開加以災歉頻仍商民困苦賦課有綱緩度支益覺不敷具有可裁減歸併者屢經釐定章程分別奏核實辦理臣又隨時核飭將可省者省可緩者緩但係缺額省分向來入少出多又未敢援咸豐以前成例月請撥款協濟惟有就款竭蹶敷衍勢難餘出若干此常年例需支細之實情也直屬百數十州縣幅員遼闊民俗強悍盜匪素多西北邊外馬賊尤夥彈壓防堵在在均關緊要惟賴各路練軍馬步

隊分布巡防兼顧口外熱河多倫庫倫等處其存營標兵除撥歸  
練軍外僅敷看守倉庫監獄護送餉犯各差及例行之事實已無  
可裁汰而海防尤關中外大局久遠要圖沿海地段縣長處處密

邇

京師東西洋各國往來窺探不可無勁旅保衛根本隨時嚴飭操  
練用備徵調而壯聲威又須於奉天之旅順口創設海外水師口  
岸駐軍布置相爲犄角淮軍分扼近畿門戶其船艇礮臺雷營機  
局船塢學堂等項皆係籌備軍實必不可少勢難遽議減併近復  
欽奉

諭旨大治水師增拓船廠安設礮臺精造鎗械遴選將才均令破  
除常格實力講求等因臣已詳確籌議專案覆陳水師既議擴充  
經費須另籌畫至現有淮練軍海防餉需惟賴部撥及各省關協

濟除部款按月給領外其餘或解不足額或絲毫未解來源既少  
挹注爲難前於開源節流案內請由部一體嚴催在案其一切支  
款並局費薪水等項督飭司道等核實經理有可裁併者無不力  
求節省不敢稍任虛糜但既入不敷出亦卽無從餘出若干此淮  
練軍海防餉需支絀之實情也謹將出入款項就近數年情形切  
實約計逐款分晰開單恭呈

御覽伏乞

皇太后

皇上聖鑒謹

奏

謹將直隸漕運關庫及淮練軍海防餉需出入款項就近數  
年情形切實約計逐款分晰開單恭呈

御覽

藩庫每年約收地糧正耗銀一百七十餘萬兩八項旗租銀十七  
八萬兩各項雜款銀十五六萬兩雜租銀一萬兩  
長蘆運庫每年約收引課鹽課銀四十萬餘兩軍需復價柴工加  
價銀二十五萬餘兩

津海關道庫每年約收常關稅料銀六萬數千兩新關稅鈔並洋  
藥釐捐銀四十餘萬兩

又每年收部撥各鎮練軍餉銀六十萬兩天津機器局經費銀十  
二萬兩江蘇藩運司協撥永定河歲修款銀三萬兩江海關協撥  
練軍餉及河工經費銀約三十萬兩東海關協撥津防練軍餉銀

約五萬兩機器局經費銀約八萬兩天津大名貨釐銀約十餘萬兩

以上每年約收銀四百五十萬兩

濟庫每年約支

東西陵俸餉等項銀三十萬餘兩旗綠各營並河營俸餉米折等項銀一百萬餘兩文武公廉驛站牧丁熱河經費並各項雜款京外各衙門雜租銀四十八萬兩應解奉天黑龍江新疆協餉銀七萬兩

長蘆運庫每年應解京餉銀三十萬兩奉餉銀約六萬兩部飯扣平暨俸工鹽價等銀約一萬兩

津海關道每年常關項下約解戶部內務府稅款及本關應支經費銀六萬數千兩新關項下約解部庫二成局稅總理衙門船鈔

出使經費銀七萬兩稅務司薪工船鈔各器通商經費並傾銘  
火耗銀七萬餘兩

又每年濟運庫撥款並江蘇藩運司協款項下約支永定南莊運  
等河歲修經費銀十五萬餘兩又藩庫撥款大名紅廠江海關協  
款項下約支東明黃河工費銀七八萬兩又各鎮練軍三十一營  
六小隊礮隊四哨應在藩庫底餉運庫復價部撥練餉江海關協  
餉項下約支官弁兵勇餉乾軍裝軍火伙夫長夫等口糧各項雜  
支及局費薪水熱河兵餉等銀一百十餘萬兩又天津大沽北塘  
等處原有海防練軍十四營三小隊應在度庫復價津海關稅釐  
東海關協餉項下約支官弁兵夫餉乾軍裝軍火各項雜支並局  
費薪水等銀三十七八萬兩又天津貨釐項下約支大沽北塘一  
帶礮臺工程並京官津貼順天府公費運鉛水腳釐局薪費等銀

九萬餘兩又津海東海兩關稅款及部撥項下約支機器局製造  
各省各路軍營鎗礮子彈藥帽等項並添置庫廠機器銀三十萬  
餘兩

以上每年約支銀四百六十萬兩皆地方常年必需之款此  
外應撥賑撫或意外緊要用項或河隄大工及大小差橋道  
等項經費尙不在內儻遇大祲則更入少出多須另籌畫  
淮軍餉除上年添募新軍由部庫按月撥餉外每年約收江漢江  
海兩關銀各四十餘萬兩蘇藩司銀十餘萬兩松滬釐捐局銀四  
萬餘兩蘇省牙釐局銀十餘萬兩兩淮四岸督銷局銀七十餘萬  
兩原撥四川改撥江蘇安徽山東銀二十餘萬兩此銀尙未盡行  
照解以上約共二百餘萬兩  
現在分紮畿境各海口要隘及奉天旅順口嶗岬嘴等處四十七



營十六哨四十二棚每年約支官弁兵勇餉乾軍裝軍火教習員弁及小輪船舵水工匠長夫等口糧並各項雜支連局費薪水銀二百二十餘萬兩亦屬收不敷支

北洋經費

此款本爲創辦水師購船置械選將練兵係海防久遠至計經總理衙門戶部奏定應山江蘇浙江江西湖北廣東福建各省釐金及粵海關海浙海山海江海各關四成稅項下歲撥銀二百萬兩乃廣東福建釐金皆截留自用江蘇以湖北無著之款空抵浙江湖北停解已久江西亦解不及半又值各關稅收短絀每年解到者不過五六十萬兩自上年海防告警報撥更稀來源枯竭今年僅收銀十餘萬兩現有船艇礮臺水雷魚雷營庫廠船塢學堂等項計口授精約歲需餉銀七十餘萬兩而所購西洋鐵甲艦鋼快

船魚雷艇轉瞬卽至月需巨款養活又擬在旅順口創建船池石  
鵞爲鐵艦修理之急需估計工費約百萬兩款皆無措只有隨時  
察酌緩急另請籌撥理合登明

舉辦團練獎敘片

光緒十一年七月初八日

再上年法人開衅畿防戒嚴疊奉

諭旨飭屬舉辦團練經臣督飭天津司道率同公正紳士高凌霄等妥細勘辦就津郡挑選精壯萬餘人籌給軍械按期輪班操練查照舊章酌收城廂房租並令商富捐資以充經費又另抽練千人分立兩營日給口糧常川練習派津紳鄧啟元等管帶飭天津府縣暨守望局員提調一切事宜其畿東一帶令該管道府州縣體察辦理每處團練數百人千餘人不等前經

奏報在案迨今夏和約議定飭於五月間妥爲遣散各安生業查津郡團練自咸豐初年殺賊立功義聲甚著惟民情强悍防範稍疏卽虞橫生枝節且值連年災歉民窮財匱籌費尤難此次疊經官紳剴切勸諭陸續湊捐一面督率操防嚴明約束團集萬眾均

能恪守營規其奮敵愾同仇之義聲勢頗壯流弊毫無口糧軍器等項用銀二萬餘兩皆由捐款濟用並未動支官帑該官紳辦理得宜不無微勞足錄自應擇尤酌請獎敘據司道季邦楨萬培因周馥等具詳前來所有津紳提督銜遇缺題奏總兵鄧啟元擬請照銜

賞給封典副將銜游擊川南運河營守備郝慶淵擬請歸游擊班後

賞加總兵銜三品銜候選道高裕源擬請

賞加二品銜候選員外郎沈祖勳五品銜候選通判姚學源均擬

請加四品銜候選通判黃鑑擬請加同知銜翰林院庶吉士高淩

霄前浙江台州府知府徐士熊刑部候補郎中李士鈺候選員外

郎喬柏年楊俊元候選通判王守善均擬請從優議敘天津府知

府汪守正天津縣知縣陳以培守望局委員候補知府張保泰及  
畿東勸辦團練編查民船嚴杜接濟最爲出力之永平府知府福  
謙灤州知州郭奇中均擬請從優議敘仰懇

天恩俯准照辦以示鼓勵所有天津及畿東勸辦民團現已遣散  
請將出力員紳擇尤酌給獎敘緣由理合附片具陳伏乞

聖鑒訓示謹

奏

李元華請卹片

光緒十一年七月初八日

再前任山東布政使李元華由舉人揀選知縣於咸豐三年奉檄在安徽六安州本籍倡辦團練毀家紓難以忠義感動士卒一時志節之士多爭附之親冒矢石挫賊鋒四年連克六安英山軍聲益振前安徽撫臣福濟調赴廬州防剿機宜均資商榷協同攻復廬州府城並帶練克復無爲潛山太湖等州縣十年九月僞英王與捻匪合股攻撲六安壽州賊眾數十萬軍民震駭該員星夜赴援設法堵禦遂得無恙同治二年前漕督臣吳棠奏調總統邳宿海沭清淮馬步諸軍嚴防捻逆六年補授兩淮鹽運使籌濟餉精力顧危局旋由江蘇按察使調補山東按察使所至清理積案民無羈累十二年升授山東布政使正己率屬於用人理財諸政務持大體光緒三年署山東巡撫時值大旱籌辦賑撫實惠及民

並以黃河隄工代賑全活甚眾故北數省奇荒而山左流亡獨少嗣因隄工報銷舛錯部議革職上年海防戒嚴奉

旨辦理天津團練並經臣奏派總理海防各軍營務處翼長感激朝廷錄用之恩力圖報效督率操練講求戰守昕夕靡閒團民感其忠義共奮同仇詎本年四月十八日督操回寓陡患頭暈汗出不止遽爾溘逝查光緒七年前山東撫臣任道鎔以該故藩司經手隄工經費僅祇報銷錯誤銀兩確歸實用奏請開復原官部議俟冊報到日查明是否相符再行核議上年吏正報銷旋經工部題稱按冊逐款確核均屬相符工料並無浮冒應准銷結其開復之處另由吏部辦理等因十二月二十日奉旨依議欽此乃吏部尚未議覆該故藩司竟因積勞疾歿軍營並無親屬在側敝廕蕭然幾難爲殮殊堪憫惻伏念軍興以來凡效

力行間勞勩夙著者雖獲祀於生前每荷  
旌揚於身後

聖朝勸忠之意至深且遠該故藩司李元華起家軍旅屢立戰功  
服官各省亦著政績其隄工報銷業經更正並由工部核准銷結  
本係公罪例得開復原官與實有處分者不同茲於天津海防軍  
營積勞病故實能勩勞王事據天津司道李邦楨萬培因周馥等  
與各鎮將合同請奏前來合無仰懇

天恩俯准將李元華開復原官並照軍營積勞病故例議卹以昭  
激勸理合附片陳請伏乞

聖鑒訓示謹

奏



雷正綰請發柴草價片

光緒十一年七月初八日

再准陝西固原提督雷正綰文稱去冬統率馬步各營駐防北洋營口地方軍中應需糧料柴草價皆昂貴非同陝甘山叢地野柴草可就近采伐無須購買自到防後以陪都重地嚴禁各營不准擅取民間一草一木惟勇丁所得月餉僅敷糧料等項其柴草價別無所出且本部刪除步隊長夫馬隊先鋒領旗長夫雜費馬乾各項以致軍用不敷擬照淮軍章程准將柴草一項按日折銀發給俾勇丁得資炊爨地方永無擾累所需銀兩卽在原撥餉雜款內勻給請核奏等因前來臣查軍中柴草係日用必不可少直奉一帶向來無可自行采伐之處該軍調駐北洋操防勞苦據請發給柴草價核與淮軍定章相符按每勇丁日給三斤僅合銀五釐四毫且於原撥餉雜款內勻給亦無須另行籌添仰懇

天恩俯准照辦以示體恤而免騷擾理合附片具陳伏乞

聖鑒訓示謹

奏

機器局報銷摺

光緒十一年七月二十六日

奏為天津機器局光緒九年分動用經費各款遵照新章造冊報銷恭摺仰祈

聖鑒事竊查天津機器局經費奏明動撥津海東海兩關四成洋稅作正開銷光緒六年九月經臣奏明由戶部月撥邊防餉銀一萬兩接濟截至光緒八年分止業經督飭局員將支銷款目開列簡明清單具奏疊經戶兵工三部核覆准銷上年戶部奏定章程光緒九年正月以後概令造冊報銷其添購機器等款事前報明立案等因當飭將該局員匠人等細數及添購機器續建工程各款咨部立案為九年報銷根據亦經戶工二部覆准在案茲據承辦局務之津海關道周馥現署河道劉汝翼候補道潘駿德等詳稱光緒九年該局承造洋鎗藥礮藥餅藥銅帽拉火毛瑟鎗子

前後膛新式礮彈沈雷碰雷電箱電綫等項均遵向章辦理西洋  
後門礮所裝銅引機巧日新隨時變通盡利仿造棉花火藥已有  
成效前將機器購到當卽蓋造新廠三十餘間另蓋火箭房以爲  
造礮船號火之用其製造本局及神機營各處器具成件較多動  
用經費計上屆報銷案內除存料外原存銀六萬八百十兩五錢  
四分三釐三毫八絲三忽本局九年分共領海關四成洋稅及部  
撥邊防餉銀二十八萬一千六百九十七兩二分又收各省剿選  
軍火價銀三萬一千七百三十九兩八錢六分三釐其支用銀二  
十七萬七千七十八兩一分八釐四毫一絲五忽除存料外仍存  
銀九萬七千一百六十九兩四錢七釐九毫六絲八忽其閒動用  
各款遵卽分冊造報計全案收支總數及員弁司事工匠夫役人  
等薪工銀兩爲第一冊購辦器料續建工程及核付險腳等項銀

兩爲第二冊舊管物料按款核報爲第三冊收支物料分項造報  
用存物料作爲光緒十年分舊管爲第四冊製成軍火分別撥存  
各項爲第五冊外撥小輪船及挖河機器船薪糧物料並行營製  
造局用料爲第六冊其製成軍火器具歷屆月行造冊呈送總理  
各國事務衙門備查茲循舊造報聲明光緒九年當法越構衅之  
時海防備預維嚴各省又紛請協撥軍火該局供億之餘兼資儲  
備用款視八年分所增有限而存料較夥均係竭力撙節實用實  
銷毫無浮冒惟器料險腳等款多與外洋交易並無例價可限詳  
請具奏核銷並據片詳該局所購物料每屆十月封河須俟次年  
開凍起運是以向來必豫儲半年之需方免缺乏本屆所存銀兩  
已經購料動用部議劃分年限應流歸光緒十年分造報並請附  
奏立案前來臣查部議各省機器局造冊報銷無非實事求是互

相考校現查該局所呈各冊臣覆加確核委係核實動支並無虛飾除將清冊分送總理衙門並戶兵工三部查照核銷外所有天津機器局光緒九年分動用經費造冊報銷緣由理合恭摺具陳伏乞

皇太后

皇上聖鑒敕部核覆謹

奏

工賑清單片

光緒十一年七月二十六日

再准工部咨光緒元年以後辦理工程均令於兩年限內造冊報銷等因當經分行遵照茲據辦賑局司道詳稱按照部咨查得已歸賑案銷結者其十一一起早經彙開工程用款清單奏免造冊於光緒四年九月五年十二月八年八月先後奉

旨允准欽遵在案伏查前項工程皆當災歉之際民情困苦不得不藉工代賑一舉兩得勘辦之始均由臣揀派廉幹員紳認真督辦招集窮民計口授食或計土方量給津貼有民工不能辦者則酌派營勇挑築僅發器具犒賞並無工價處處力求節省按工部例價減而又減確係實用實銷並無絲毫浮冒至用款多係勸募而來亦非請帑辦理者可比現在事越多年承辦員紳大半離直無從逐案造冊且已開單報銷均奉

諭旨允准自應欽遵銷結仍免另造細冊以省繁費等情具詳前來臣查以工代賑係爲救荒恤民實與尋常辦法不同勢難牽合成例該司道應詳係屬實情應請照辦敬繕案由清單注明奉旨日期恭呈

御覽伏乞

聖鑒敕部查照仍遵原奉

俞旨免其造冊謹

奏



御覽

謹將光緒元年以後承辦工程已經准銷各案開單恭呈

一光緒三年永平府紳商捐修城垣工程一案

一光緒三年深州紳商捐修城垣工程一案

一光緒二年修築密雲縣白龍潭龍神廟工程一案

以上三案均歸災案彙開清單奏報免造細冊於光緒四年九月二十九日奉

旨允准

一光緒四年通州平家疃隄工由直撥發工撫銀兩一案

以上一案已歸災案彙開清單奏報免造細冊於光緒五年十二月二十二日奉

旨允准

一光緒二年興修保定府省城城垣工程一案

一光緒七年修築蠡縣高陽潞龍河南隄並酌挑北岸淤灘工程  
案

一光緒七年修築任邱等縣千里長隄工程一案

一光緒八年開挖文安縣臺頭以下及天津韓家墅以上東淀河  
道工程一案

一光緒八年因漳沱已復子牙河故道將獻縣新河開寬並修築  
獻縣以下六縣子牙河工程一案

一光緒八年加修蠡博任雄一帶隄工一案

一光緒八年開挖津東塌河淀新河分洩淀水工程一案

以上七案均歸災案彙開清單奏報免造細冊於光緒八年  
八月二十二日奉

旨允推理合登明

送李昱應回國摺

光緒十一年八月十五日

奏為遵

旨派員護送李昱應回國事竣即行晉京

陛見謹將起程日期恭摺

奏報仰祈

聖鑒事竊臣欽奉七月初四日

寄諭李鴻章前寄總理衙門信函業經該王大臣等呈覽此時朝鮮使臣未到未便降旨著俟此事辦竣該督即行來京陛見欽此

又奉八月十二日

上諭李昱應到保定後該國王曾兩次咨請禮部代奏懇恩放還茲復遣使臣閔種默等恭摺表文籲求恩釋情詞迫切至於再三宜沛殊施俾仲孺慕李昱應加恩准其開釋即著李鴻章派委妥

員護送回國等因欽此仰見

朝廷履庇屬藩爲該國王父子委曲求全無微不至欽佩莫名臣  
當卽恭錄

諭旨傳知李是應並宣布

皇仁勉其保全晚節是應跪聆

聖訓懼怖之餘繼以感泣臣一面遵委分發補用同知袁世凱前  
江西南贛鎮總兵王永勝乘坐兵輪伴送李是應至仁川再抽派  
水勇數十人護入王京沿途加意照料並飭將李是應回國後詳  
細情形密查具報去後臣卽部署一切定於八月十八日遵  
旨起程入都伏念臣自辛巳九月

陛辭出京於今四載憂患侵尋儻尤叢集私心惴惴恐不復能瞻

仰

天顏而區區戀

闕之忱數年以來無時或釋去秋專疏請

覲欽奉

懿旨以防務緊要

諭令毋庸來京弗克如願茲幸法事既定朔防亦撤李星應遣送東歸地方民情諸臻綏謐得遂微臣積年依戀之私以後應辦事宜並可親承

訓示與在

廷諸臣妥商定議忻幸實深再臣此次帶印就道省署日行公事及津署尋常洋務飭委署藩司松椿津海關道周馥分別代印代行其緊要事件仍包封遞臣行次核辦合併陳明所有派員護送李星應回國並恭報起程晉京日期謹繕摺具陳伏乞

皇太后

皇上聖鑒

奏

法國陸路通商片

光緒十一年八月十五日

再臣欽奉八月十一日

寄諭法國使臣來華會議滇粵陸路通商章程該大臣務當悉心籌畫詳細商議總期周密妥善至與該使會議或在京師或在天津均無不可並著酌度具奏等因欽此遵查本年四月中法商定條約第五六款載明與北圻陸路交界允准甲外商人運貨進出貿易擇地設關收稅事係創辦會議之際必須詳慎周妥免致將來窒礙頃法國水師提督利士比來津謁晤據稱該國新派會議商約使臣喀戈當於七月初起程統美國日本來華約九月初可抵上海巴德諾擬先期由京赴滬交代使事計喀戈當須九月間抵京等語臣酌度情形兩國會議商約非急切所可辦妥臣自應先行



陸見面請

聖訓如法使喀戈當到京臣卽就近與總理衙門王大臣會同商酌妥議大略如一時議難就緒或再商令喀戈當來津議辦且商務與界務相連應先勘定邊界方能指定通商互市處所周德潤鄧承修等昨始由津乘輪南下計到滇粵會勘需時正不妨從容籌議也合先附片覆陳伏乞

聖鑒謹

奏

肄習西學仍請給獎片

光緒十一年八月十五日

再臣前保出洋肄業並天津招募學生學業有成及中西教習出力人員照章酌擬獎敘一摺三月初六日奉

旨唐榮浩等張席珍等均著照所請獎勵欽此查所保文職各員業經吏部照章核准註冊武職員弁兵部改照尋常勞績核駁未免兩歧竊維選募生徒出洋學習軍政船政步算製造諸學實爲自強至計事極艱難又經重洋危險非明示優獎不足以鼓舞人心臣與曾國藩前曾奏明俟學成懇賞頂戴官階前船政大臣沈葆楨亦有船政局員弁生徒請毋庸照尋常勞績核減之奏自定章以來臣於光緒五年奏保派往德國學習兵法技藝期滿回華之千總袁雨春等又會同沈葆楨等奏保船政學生學業有成之都司劉步蟾等均係免補本班奉

旨允准並經兵部核准在案此次列保赴美國生徒事同一律該生等在洋已歷十年八年之久回華分派當差又逾四年於外洋軍政諸學頗有心得天津招募學生規制與船政局相仿歷在水師等營勤奮學習並出海操巡深明欲要閱時既久勞瘁不辭經臣等次考核始擇尤保獎且擬請守備以上者僅止數員餘皆千把總外委官階微末並未敢一律從優方今風氣初開人才難得若併此漸而不與實恐有志之士無以觀感稽與此非尋常勞績可比自應仍照歷屆出洋肄業及船政生徒學成請獎章程核辦既與部例並行不悖亦與袁雨春等成案相符除停保衛職及不准超越加銜應照部章辦理外所有都司銜補用守備山海路中軍千總寶良順應請仍照原保免補守備以都司儘先補用並照部議俟補都司後再加游擊銜軍功方鳳鳴蔡廷幹王良登把總

劉金元均請改以營千總不論雙單月選用並加守備銜其餘原保免補本班及儘先班次之參將劉恩榮千把總王湧泉等各員仰懇

天恩飭部仍遵前

旨給獎註冊以昭激勸理合附片具陳伏乞

聖鑒訓示謹

奏

創辦電報請獎摺

光緒十一年八月十五日

奏爲歷年創辦沿江沿海各省電報先後告竣有裨軍國大計請將出力各員擇尤獎勵恭摺仰祈

聖鑒事竊泰西各國偏設電報通消息於數萬里外且夕往還呼應臣以中國洋務海防諸大端事機皆關緊要非此不能靈捷卽商民之轉輸貿易者亦可藉此以速致有無而廣收利益且英法美德各使曾請在上海設立萬國電報公司若中國不亟自爲無以杜外人之狡謀保我自有之權利因於光緒六年奏准試辦陸路電綫遴派布政使銜直隸候補道盛宣懷從天津至上海一路辦起工竣後南北官報商報瞬息可通成效立見英使格維納旋執同治九年總理衙門已允成案請由英商添設自上海至甯波温州福州廈門汕頭各口海綫當令盛宣懷設法抵制絕其覬覦

並去丹國已設上海至吳淞陸綫英國已設之九龍陸綫堅明約  
東仍逐漸推廣又奏設上海至浙閩遼廣州陸綫並接至香港自  
行設局不使港綫侵入粵境英綫進至福州於是沿海各省電報  
始得自主權利不致外散嗣左宗棠奏設長江電綫以通武漢張  
樹聲奏設廣西電綫以達龍州臣又飭將天津電綫展至山海關  
並設各防營支綫以連朔度又自津北達通州而至京城其由山  
海關至旅順山濟甯州至煙臺山營口至奉天省城各路電綫亦  
卽次第辦理今又辦奉天至鳳凰城邊門以達朝鮮仁川一路矣  
五年以來創設沿江沿海各省電綫係互一萬數千里  
國家所費無多巨款悉由商集適值法人起衅沿海戒嚴將帥入  
告軍謀

朝廷發縱指示肯得相機立應無少隔閡朝鮮兩次內亂遣兵保

謏勉日奏功中國自古用兵未有如此之神速者其京外一切要  
政及與出使大臣往來問答莫不朝發夕至海外直若戶庭假令  
沿途口岸皆爲英丹海綫所佔則有事之際或竟爲敵人所用或  
守局外例凡我密電不代傳遞事機必滯貽誤必多今成效昭著  
實賴羣策羣力查承辦各員皆能於從來未經之事勞心苦思胼  
手胝足設法趲辦或躬率工匠勘路植桿設綫終歲在途頻經危  
險或晝夜傳遞緊急軍報疲饋不遑甚至積勞成疾或重洋護運  
料物涉歷風濤以及各省總分各局與沿途工次暨天津電報學  
堂調度教習各員均屬異常出力有裨軍國現值各省大工告竣  
若不酌給獎敘不足以勸將來前准左宗棠曾國荃楊昌濬劉銘  
傳劉秉璋咨請會同奏保飭據總局道員盛宣懷開單詳送聲明  
粵省辦理官綫各員另請兩廣督臣奏獎直奉官綫另行核酌等

情前來臣查黃河合龍工程及接遞外洋文報均照異常勞績給獎有案今創辦電綫大工及由電接遞軍報事極艱鉅其勞績實皆過之而裨益

國家控制中外全局尤大且遠自應擇尤請獎其出力稍次者仍照尋常勞績核擬俾示區別謹開單恭呈

御覽仰懇

天恩俯准照擬給獎以勵人才理合會同南洋大臣兩江督臣曾國荃閩浙督臣楊昌濬福建撫臣劉銘傳浙江撫臣劉秉璋合詞恭摺具陳伏乞

皇太后

皇上聖鑒訓示謹

奏



盛宣懷請獎片

光緒十一年八月十五日

再沿江沿海各省出綫係派布政使銜直隸候補道盛宣懷總理其事該道首贊成議會商各省地方官次第籌辦事屬創始而規畫精審調度悉合機宜用能妥速告成遠近無擾復以經費有常勸集華商巨款將各省正綫改歸商辦俾公家久享其利商人亦獲什一之盈實能裨益大局各國覬覦已久英丹電報公司且於九龍及上海至吳淞安設陸綫方謂非常之舉中國未必果行遂羣起相爭多方攬阻該道奉飭設法抵制相機操縱一面集資趕設沿海陸綫使彼狡謀廢然中止保我自主之權尤於

國體商情所關匪細今綫路綿亙萬數千里京外軍謀要政瞬息可通成效昭著其功實未可泯該員才具優長心精力果能任重

大事件足以幹濟時艱惟銜階已無可保應如何優加獎拔之處

臣未敢擅擬伏候

聖裁謹附片具

奏請

旨

陳允頤總辦電片

光緒十一年八月十五日

再朝鮮自仁川至奉天邊門設立陸路電綫前經臣奏派總辦電報商局盛宣懷與朝鮮政府立約委員辦理奉

旨允准在案茲據道員盛宣懷詳稱自仁川經漢城平壤義州以達邊門計程一千三百餘里地段縣長且多山路設綫事宜繁重必須遴選大員督率工匠妥速辦理查有道員用候補知府余昌宇歷辦津滬蘇浙閩粵電工極爲得力請派該員前往先從仁川開辦節節前進以期早日竣工至此後經理電報隨時修接巡查約束員匠及遴選朝人到局學習事關重要應於漢城地方設立電報總局請派候選知府陳允頤前往駐局專辦所有仁川義州平壤三處分局委員洋匠學生巡丁人等均歸該員認真督率仍隨事稟商中國電報總局核飭妥辦等情具詳前來除分檄飭遵

並咨朝鮮國王查照外理合附片陳明伏乞

聖鑒謹

奏

奏保謝家福片

光緒十一年八月十五日

再國子監學正銜江蘇文生謝家福同盛宣懷辦理電綫事宜  
實心實力井井有條凡有所見地無論遠近事無論鉅細皆竭誠  
籌助其議論亦多可採用在電局五年甚著勞勩前值直晉豫旱  
荒倡集巨資助賑經臣等奏報蒙

特恩賞給職銜近年各省偏災無不與二三同志多方勸貸分投  
拯救計歷年所集賑款不止數十萬全活災黎亦不止數十萬其  
他義舉知無不爲久爲各省官紳所共悉一介書生而有民胞物  
與之量體國經野之才實爲難得該生識略閎通辦事幹練講求  
吏治熟悉洋情若畀以牧令之任出居民上臣敢保其必爲地方  
造福茲於電務出力因係  
特賞職銜之員無可擬保惟人才可惜應否量授一官以資展布

而示鼓勵之處伏候

聖裁謹附片具

奏